

Et avanti la dita balotazione, vene Lodovico Fioravante bandito di qui per aver amazato suo padre in chiesa di Frari, qual vien di Franza, venuto per la via de, et portò letere di sier Andrea Gritti procurator e de Alvise di Piero secretario, di ultimo Marzo, da Bles, per la qual se intese colouqui dil Re zerca l'impresa de Italia, et manderia 1200 lanze, capi missier Zuan Jacomo Triulzi e monsignor di la Trimolia, et 12 milia fanti, *licet* 6000 lanzinech et 6000 guasconi e normandi; *etiam* lui in persona veria poi. Et che era stà mandato per il signor Bortolo d' Alviano e preparatoli la caxa; *tamen* li emuli non à mancato in far el tutto che 'l non sia lassato fino la Signoria non mandì la refelication di capitoli; *tamen* il Re li ha ditto, a esso sier Andrea Gritti, che 'l sa la Signoria non à capitolò, et manderà prima lui sier Andrea e l' Alviano li vegnirà drio. Come el vol mandar uno orator a la Signoria, qual sarà domino Alexandro Triulzi, e si partirà a di del mexe. *Etiam*, come è stà mandà per li zentilhomeni nostri presoni, et si duol di la morte di quel magnifico cavalier domino Zacaria Contarini, qual è morto a Paris per la piera cavata, et è stà gran peccato; e dize esso sier Andrea aver mandà sier Piero, suo fiol dil ditto qu. sier Zacaria, ch' era preson, che *etiam* lui vengi a la corte per esser liberato; con altre particolarità, *ut in litteris*; il sumario scriverò poi più difuso.

Et come era stà fata la trieva col re di Spagna, per le cosse di là, per uno anno. Hor questa morte di sier Zacaria Contarini fo divulgata da basso, perchè a caxa sua tutti pianzevano, et *licet* ditte letere fusseno venute secrete, *tamen* li loro parenti la matina levono mantelli per la dita morte.

Di Zuan Piero Stella secretario nostro apresso squizari, date a Lucerna a di 3. Come la Dieta era risolta e non voleno essi squizari acordarsi con Franza; sichè li oratori prediti si voleano partir, perchè dimandavano cosse che essi oratori non hanno voluto asentir etc.

Fu posto, per li savii d'acordo, una letera in Franza a sier Andrea Gritti sopradito e Alvise di Piero secretario, come semo contenti di capitoli et li aprovemo et ratifichemo *in omnibus et per omnia*; ben preghemo Soa Maestà ne mandì presto el signor Bortolo d' Alviano perchè possi esser al governo di le zente nostre; con altre particolarità, *ut in ea*. E fu presa di tutto el Conseio, nè fo alcuna contradiction, e fo comandà credenza; e dita letera in zifra parti il zorno sequente.

Fu intrato in materia pecuniaria: poste per i sa-

vii tutti, excepto sier Alvise da Molin, do decime e 1/2 tansa a li governadori a restituir, *ut in parte*, di danari di sali di le terre nostre presente et quelle se acquisterano. Et sier Alvise da Molin savio dil Conseio andò in renga, dicendo non vol decime ni tanse per non agravar li citadini che sono assa' agravati, ma vol trovar 50 milia ducati presti senza questo. E disse il modo, *videlicet* ducati 10 milia di certi daci, ducati 5000 di zudei che trovano con 12 per 100 a l'anno, averano li danari ducati 3000. *Item*, ducati 9000 di debitori di tanxe a restituir ubbligandoli troverà li danari, e altre soe opinion; qual però non le disse; et per esser l'ora tarda, fo terminà indusiar a doman.

In questa matina, in do quarantie, fo introduto, 73* per sier Marin Morexini avogador, la causa dil contrabando di le sede, et parlò di taiar el Conseio, che fo spazà per esser stà Pregadi li 40. Li rispose Marin Querini avochato; fo rimessa a doman, che lo expedirano, e non fo balotata.

*Scurtinio di do executori a le cazude
justa la forma di la parte.*

74

Sier Fantin Bon el grando, qu. sier Felixe	70.120
Sier Piero Querini, fo sopracomito, qu. sier Biaxio	64.123
Sier Zacaria Bembo, fo provedador a Bassan, qu. sier Francesco	47.140
Sier Andrea Balbi, fo sopragastaldo, qu. sier Stai	111. 78
Sier Hironimo Trivixan, fo castelan a Castel Lion, qu. sier Andrea . . .	33.151
Sier Andrea da Mosto, fo capitano in Po, qu. sier Piero	68.121
Sier Nicolò Alberto el grando, qu. sier Zuan el dotor	87.103
Sier Bernardo Boldù, fo in l'asedio di Padoa, qu. sier Filippo	45.145
Sier Antonio Balbi, fo Cao di 40, qu. sier Jacomo	81.115
† Sier Stefano Contarini, fo provedador a le biave, qu. sier Davit	134. 49
Sier Francesco Minio, fo Cao di 40, qu. sier Nicolò	47.143
Sier Lorenzo Barbaro, fo cataver, qu. sier Antonio	83.104
Sier Zuan Balbi el grando, qu. sier Marco	61.125